

4 pelajar Malaysia juarai pertandingan Airbus

Kuala Lumpur: Pasukan R.E.D (Response for Emergency & Disaster) yang diwakili empat pelajar pascasiswazah berjaya mengharumkan nama Malaysia apabila menjuarai Pertandingan Airbus Start-Up 2017 di Singapura, baru-baru ini.

Johan dibarisi tiga pelajar Universiti Malaya (UM), iaitu Choo Hui Kang, Tan Chee Hau dan Chew Sze Soon, bersama Brenna Chen Jia Tian dari Universiti Putra Malaysia (UPM), membawa pulang hadiah wang tunai S\$5,000 serta berpeluang menimba pengalaman simulasi penuh penerbangan Airbus A380.

Jia Tian berkata, mereka mempertaruhkan projek inovasi yang memberi respons dan bantuan pada insiden kecemasan atau bencana dengan lebih cepat menggunakan Internet of Things (IoT), data satelit serta dron yang akan diletakkan

di kawasan penyeliaan tertentu, termasuk taman perumahan.

Guna teknologi dron

“Projek R.E.D memanfaatkan kecanggihan teknologi dron dengan peralatan penting diperlukan responden, bergantung kepada jenis kecemasan dan bencana yang berlaku.

“Inovasi ini digunakan bersama aplikasi dalam telefon pintar bagi membolehkan pengguna melaporkan kecemasan yang berlaku dengan segera, sekali gus memberi isyarat kepada dron diletakkan di kawasan berhampiran untuk mewar bantuan diperlukan,” katanya ketika ditemui di Balai Berita di sini.

Pertandingan Airbus Start-Up memberi peluang untuk peserta berkongsi idea pembangunan teknologi yang digunakan bagi

Pasukan R.E.D dinobatkan sebagai pemenang tempat pertama Pertandingan Airbus Start-Up 2017.



menambah baik kehidupan masyarakat dalam aspek pengangkutan, kemudahan dan keselamatan.

Temui bakat baru

Selain tuan rumah, lima negara lain yang mengambil bahagian ialah Malaysia, Perancis, India, Turki dan Belanda.

Sementara itu, Ketua

Pegawai Eksekutif Airbus Helicopters, Guillaume Faury, berkata Airbus mengambil pelbagai langkah untuk membabitkan diri dalam ekosistem start-up melalui penganjuran pertandingan berkenaan, sekali gus menunjukkan usaha pada peringkat global bagi mempertingkat inovasi dalam industri aeroangkasa.

“Pertandingan ini membolehkan Airbus menerokai ekosistem start-up di rantau ini. Selain itu, kami berjaya menemui bakat baharu yang memiliki idea hebat, malah saya berkeyakinan sesetengah daripada mereka akan memberi sumbangan pada perkembangan inovasi aeroangkasa di rantau ini,” katanya.

Fakta nombor

Pertandingan Airbus Start-Up 2017

13 PASUKAN
mengambil bahagian

3-5 PESERTA
mewakili setiap pasukan